



MAJLIS PENYAMPAIAN KEUNTUNGAN TERKUMPUL RTBB 2007 DAN DIVIDEN TSK 2008 RISDA NEGERI KEDAH

UCAPAN PERASMIAN

**YANG BERTHORMAT SENATOR TAN SRI DATO' SERI MUHAMMAD BIN MUHAMMAD
TAIB, MENTERI KEMAJUAN LUAR BANDAR DAN WILAYAH**

**KG. KEDA WANG, KODIANG, KEDAH
6 SEPTEMBER 2008
10.30 PAGI**

Yang Berusaha Saudara Pengerusi Majlis

Yang Berbahagia Dato' Ali Nordin bin Wahiduddin
Timbalan Ketua Pengarah (Pembangunan)
Mewakili Ketua Pengarah RISDA

Yang Dihormati En. Azmi bin Mohamad
Pengarah RISDA Negeri Kedah

Tuan-Tuan dan Puan-Puan yang dihormati sekalian

Assalamualaikum Warahmatullahi Wabarakatuh,

1.0 PENGHARGAAN

Marilah kita bersama-sama pada hari ini memanjangkan kesyukuran kita kehadiran Allah S.W.T kerana dengan limpah, kurnia dan rahmatNya dapat kita berkumpul di sini bagi Majlis Penyampaian Dividen Rancangan Tanam Baru Berkelompok atau RTBB RISDA Negeri Kedah 2008. Saya mengambil peluang di sini untuk mengucapkan ribuan terima kepada Pengurusan RISDA atas kesudian menjemput saya untuk merasmikan Majlis ini. Saya juga mengalu-alukan kedatangan semua peserta-peserta RTBB

3

serta pekebun kecil Negeri Kedah dan saya berharap Tuan-tuan dan Puan-puan dalam keadaan sihat walafiat dan sentiasa dilindungi oleh Allah SWT dalam usaha kita untuk menjalankan tugas dan tanggungjawab kita.

2.0 SENARIO INDUSTRI GETAH MASAKINI

Saya ingin mengambil kesempatan di sini untuk menyentuh senario industri getah pada masa sekarang iaitu dari segi pengeluaran dan juga harganya supaya Tuan-tuan dan Puan-puan jelas dengan kedudukan industri ini yang menjadi tulang belakang kita semua.

4

Senario industri getah sekarang berada dalam tahap yang membanggakan dengan kenaikan harga getah dalam pasaran global. **Pengeluaran getah negara adalah 1,199,600 Metrik Tan. Daripada pengeluaran ini, 95 % atau 1,139,620 Metrik Tan adalah dikeluarkan oleh sektor pekebun kecil dan 5.0 % atau 59,980 Metrik Tan adalah dari sektor estet. Dari segi keluasan pula, jumlah keluasan getah adalah 1.24 juta hektar di mana pekebun kecil memiliki 95 % (1,177,700 hektar) dan estet memiliki 5 % (59,600 hektar).** Daripada ini, seluas 965,900 hektar atau 82 % berada di Semenanjung Malaysia, 145,000 hektar atau 12.3 % di Sarawak dan 66,600 hektar atau 5.7 % adalah di Sabah.

5

Pada masa ini, Malaysia merupakan pengeluar getah asli ketiga dunia selepas Thailand dan Indonesia.

3.0 HARGA KOMODITI GETAH SEMASA

Harga getah asli menunjukkan peningkatan selepas tahun 2002. SMR 20 yang menjadi asas pengiraan harga getah skrap keluaran pekebun kecil telah meningkat. **Purata harga tahunan telah meningkat sebanyak 257.5 % iaitu dari 205.56 sen/kg pada tahun 2002 kepada 734.83 sen/kg pada 2007.** Kenaikan harga ini adalah disebabkan peningkatan permintaan dunia terutama dari negara China dan India yang menunjukkan perkembangan yang

6

pesat dalam industri otomobil. Kenaikan harga minyak mentah walaupun telah menurun sedikit kepada **USD 109.71 setong** pada **3 September 2008**, turut menyumbang kepada kenaikan harga getah asli. Oleh itu, harga Getah tiruan yang berasaskan minyak mentah akan turut naik. Dengan ini, pembeli di jangka beralih ke getah asli dan menyebabkan permintaan getah asli akan terus meningkat.

Harga SMR 20 pada 3 September 2008 adalah RM 9.57/kg. Dengan keadaan pasaran getah yang baik pada masa ini, dijangka

7

harga akan terus bertahan untuk jangka masa panjang sehingga 2015 dan prospek industri getah negara adalah sangat cerah.

4.0 PENINGKATAN PRODUKTIVITI

Sektor pekebun kecil menyumbang *95.4 peratus* kepada pengeluaran getah negara. Walaupun mereka adalah penyumbang utama pengeluaran getah negara, mereka masih lagi berhadapan dengan masalah-masalah yang berlarutan seperti saiz kebun yang kecil dan tidak ekonomik, tenaga kerja yang kurang, umur pekebun kecil yang meningkat tua. Dan kesemua ini membawa kepada produktiviti dan pendapatan yang rendah dan

8

menjurus kepada kemiskinan. Pada masa ini pengeluaran hasil kebun getah pekebun kecil amat rendah berbanding dengan hasil sebenar yang boleh dikeluarkan mengikut jenis klon getah. Hasil keluaran pekebun kecil hanya dalam lingkungan 1,599 kg/hektar setahun. Sedangkan hasil sebenar purata boleh mencapai 5,400 kg/sehektar/setahun.

Analisis Produktiviti Getah menunjukkan Produktiviti Getah Pekebun kecil telah meningkat dari 1,372 kg/hek/tahun pada tahun 2006 ke 1,599 kg/hek/tahun pada tahun 2007 iaitu peningkatan sejumlah 16.5 %. Saya dengan penuh ikhlas mengucapkan ribuan terima kasih di atas komitmen dan

9

kesungguhan yang ditunjukkan oleh Tuan-Tuan dan Puan-puan. Walau bagaimanapun, usaha-usaha untuk meningkatkan pengurusan dan peningkatan produktiviti kebun masih perlu dilaksanakan berterusan secara terancang dan teratur supaya kebun getah dapat mengeluarkan hasil dalam tempoh 41/2 tahun dan mengeluarkan hasil tidak kurang daripada 2,000 kg/hek/tahun.

5.0 BANTUAN TANAM SEMULA SAWIT KE SAWIT PEKEBUN KECIL

Kerajaan di bawah kajian semula RMK9 telah meluluskan Bantuan Tanam Semula Sawit ke Sawit mulai 1 Januari 2009 bagi kebun-

kebun sawit kurang daripada 2.5 hektar. RISDA telah di lantik sebagai agensi pelaksana dan peruntukan yang telah diluluskan adalah RM16.89 juta bagi tahun 2009 dan 2010 dengan menggunakan peruntukan sedia ada di RISDA. Di bawah program ini, pekebun kecil akan di bantu dengan bantuan tanam semula termasuk benih, baja dan kos upah.

Langkah ini di ambil setelah mengambilkira bahawa terdapat sejumlah 296,361 hektar kawasan kebun sawit yang telah di tanam lebih 25 tahun dahulu dan kini telah sampai masa untuk di tanam semula. RISDA menggangarkan 50% dari kawasan ini kurang daripada 2.5 hektar. Dari kajian RISDA juga, dalam tempoh

25 tahun kebelakangan ini, pendapatan purata pekebun kecil yang memiliki kurang daripada 2.5 hektar adalah sekitar RM600 sebulan. Jumlah ini tidak cukup untuk mereka menabung untuk membiayai tanam semula.

6.0 MENABUNG UNTUK BAJA DAN INPUT PERTANIAN LAIN

Dengan harga getah yang tinggi pada masa ini, Tuan-Tuan dan Puan-Puan adalah digalakkan supaya menabung untuk menampung pembelian input pertanian seperti Baja, Bahan & Peralatan rangsangan, Racun rumpai dan lain-lain. Dengan adanya penabungan ini, Tuan-Tuan dan Puan-Puan boleh

mengamalkan teknologi dan amalan pertanian yang baik secara terancang. Amalan pertanian yang baik pula akan meningkatkan produktiviti kebun.

Tuan-Tuan dan Puan-Puan disyor membuat **penabungan bulanan minimum sejumlah 30 sen sepokok sebulan**. Dengan bilangan 400 pokok sehektar, jumlah penabungan yang boleh dibuat adalah RM120.00 bagi sehektar kebun getah. Jika Tuan-Tuan dan Puan-Puan mempunyai disiplin yang tinggi dalam penabungan, ia pasti akan memberi impak yang sangat baik kepada produktiviti kebun, seterusnya meningkatkan pendapatan Tuan-Tuan dan Puan-Puan.

7.0 KEMPEN PENANAMAN SAYUR DI PERKARANGAN RUMAH

Kenaikan harga minyak baru-baru ini telah menyebabkan harga barangan keperluan harian meningkat. Pekebun kecil merasai kesan ini dan terpaksa membayar harga yang lebih tinggi ke atas barangan keperluan harian. Bagi membantu mengatasi masalah ini, kerajaan melalui Kementerian Kemajuan Luar Bandar dan Wilayah mengadakan kempen untuk menggalakkan masyarakat Luar Bandar menanam sayur di perkarangan rumah untuk keperluan sendiri dan mengurangkan bebanan kos perbelanjaan

seharian serta untuk mewujudkan kesedaran pekebun kecil terhadap kepentingan makanan segar yang berkhasiat.

Jenis-jenis sayur yang digalakkan adalah sawi, bayam, kangkung, terung, bendi, cili, kacang panjang, ulam-ulam serta herba seperti kunyit, daun kari, serai, pandan, lengkuas dan kantan.

Khidmat sokongan yang akan disediakan oleh RISDA adalah bekalan benih sayuran terpilih, bekalan baja yang bersesuaian serta mengedarkan risalah penanaman sayuran.

Jumlah peruntukan yang telah disalurkan kepada RISDA adalah RM 1.55 juta untuk kumpulan sasaran seramai 170,000 pekebun kecil.

8.0 PEMBAYARAN DIVIDEN RTBB NEGERI KEDAH

RTBB ditubuhkan bagi membantu golongan pekebun kecil yang mempunyai tanah kurang daripada 7 ekar untuk menambah keluasan yang dimiliki. Skim ini yang dilaksanakan mulai tahun 1974 memberi peluang kepada pekebun kecil yang memiliki tanah sebelum 31 Disember 1970 menggunakan hak kelayakan Tanam Baru mereka untuk menyertai Ladang RTBB yang dibangunkan.

Bagi tahun 2007, pihak RISDA akan menyampaikan dividen yang bernilai **RM 41,322,650.00 (41.3 juta)** khusus bagi **13,986 orang** peserta dengan keluasan lebih kurang **41,322.65 hektar**. Purata bayaran dividen adalah RM2,954.57 bagi setiap peserta.

Bagi Negeri Kedah, sejumlah **RM2,075,750.00** keuntungan terkumpul RTBB akan diberikan kepada **818** orang peserta. Selain daripada itu, sejumlah **RM 2,734,616.67** dividen TSK Negeri Kedah bagi tempoh Januari hingga Julai 2008 akan juga diberikan kepada seramai 1,380 orang peserta TSK dengan keluasan **2,068.70 hektar**.

Pemberian dividen kepada peserta-peserta TSK pada hari ini adalah salah satu kejayaan RISDA yang telah membangunkan tanah-tanah pekebun kecil secara berkumpulan dan diurus secara komersial. Saya pasti jika kebun-kebun ini tidak diuruskan secara berkumpulan dan komersial, besar kemungkinan dan sudah pasti

kebun ini tidak dapat dibangunkan dan hanya ditinggalkan begitu sahaja. Ini adalah kerana purata keluasan hak milik tanah pekebun kecil adalah terhad kepada 2 hektar kebawah. Maka pihak kerajaan menggalakkan supaya pekebun kecil menanam semula secara berkumpulan. Langkah RISDA melaksanakan tanam semula berkumpulan dan juga diuruskan secara komersial adalah salah satu cara dan tindakan terbaik supaya kos perbelanjaan dapat dikurangkan iaitu dengan adanya ekonomi bidangan.

Saya percaya usaha yang dilaksanakan oleh RISDA dalam memajukan dan membangunkan kebun-kebun milikan pekebun kecil secara berkelompok dan komersial sudah tentu dapat

meningkatkan penggunaan teknologi baru setanding dengan ladang swasta dan seterusnya akan memberi faedah bersama kepada pekebun kecil. Usaha ini adalah selaras dengan dasar kerajaan yang mahukan agensi kerajaan seperti RISDA membawa perubahan dalam corak berladang atau bertani di masa akan datang.

Semoga dengan bayaran dividen yang diterima nanti dan dalam keadaan kenaikan harga minyak dan barang makanan masa ini, gunakanlah wang tersebut dengan berhemah dan jangan lupa menabung atau menyimpan untuk masa depan.

9.0 PENUTUP

Akhir kata, sekali lagi saya merakamkan setinggi-tinggi tahniah kepada RISDA khususnya RISDA Negeri Kedah kerana berjaya menganjurkan satu Majlis yang begitu berfaedah kepada pekebun kecil . Semoga Majlis ini memberi manfaat yang sepenuhnya kepada masyarakat pekebun kecil diseluruh negara untuk lebih maju lagi di masa hadapan. Azam dan kerjasama dari semua akan dapat menjayakan aktiviti pembangunan luar bandar dan semoga Tuan-tuan dan puan-puan akan terus cemerlang dalam mengharungi kehidupan yang lebih sejahtera.

**Dengan kata-kata ini, saya dengan lafaz
'Bismillahirrahmanirrahim' merasmikan Majlis Penyampaian
Dividen RTBB RISDA Negeri Kedah 2008.**

Sekian. Wabillahi taufik Walhidayah Wsb.